

Museo Numismatico a perde su pieza mas violoso:

Otro Arubiano ehemplar, Sr. Mario Odor a fayece

ORANJESTAD (AAN) -- Trankil, diasabra anochi den su cas el a keda wak parada di luz den television te ora e caba. E no tabata mustra malo, ni a duna señal di sinti su mes cansa durante e dia.

Despues di a mira e parada cu smak el a bay drumi, pero na dado momento el a haya ataca cerebral.

Direpente asina, su famia a confronta cu señor Mario Odor mester a worde transporta pa Hospital Horacio Oduber, unda diadomingo anochi el a fayece.

Ta ken no conoce señor Mario Odor? Un cabayero den tur extension di palabra, kende 56 año pasa a cuminza colecciona monedanan, tanto local como di otro paisnan, y el a skirbi un buki tambe tocante numismatica.

Na año 1981 don Mario Odor a funda e prome museo na Aruba, esta Museo Numis-

matico.

Museo Numismatico ta considera como un di esnan mas importante y completo na Antiyas, den Area di Caribe y America Latina, y sigur e ta ocupa un lugar di honor na mundo.

Tambe señor Odor su nomber ta aparece como un di e figuranan cu a diseñá e bandera di Aruba, y pa su amor pa e cultura di Aruba y tur su aporte, el a worde condecora dos biaha pa La Reina.

Tambe e hunto cu su inseparable esposa a cana den mondi pa temponan largo colectando diferente sorto di piedra, y asina nan a habri na nan mesun cas e Museo di Antigüedad unda nan ta expone diferente articulo y un cantidad enorme di piedra diverso, acompaña pa nan nomber y historia.

Awe Museo Numismatico a

lanta sin su pieza mas importante, y na cas di famia Odor tambe ta falta su pilar.

Señor Mario Odor semper a biba enamora di su señora Ines mescos cu dia cu nan a conoce otro.

Como tabata e tabata mesun ehemplar cu como casa. Su amor incondicional pa su yiunan, a crea un nucleo familiar fuerte y inkebrantable, te awendia.

Na edad di 81 año, señor Mario Odor a bay sosega lagando su famia, su pais Aruba, y recuerdonan imborable di un persona hopi social, cu a stima tambe deporte futbol den special, y hasta un tempo tabata miembro di AVB.

Den diferente oportunidad DIARIO a ricibi e bishita di don Mario cu su señora den nos redaccion. Un espacio den nos corant semper tabata importante pa don Mario, y motibo pa e yama despues cu e bunita gesto di gradici.

Den nos memoria y nos curazon tambe señor Mario Odor lo keda presente. Cu su partida sin duda algun, nos comunidad a perde otro gran Arubiano.

DIARIO ta manda palabranan di condolencia pa su inseparable esposa señora Ines, su yiunan, y demas famia. Cu Dios duna nan conformidad y forza pa acepta e

perdida grandi aki, y sigur for di cielo don Mario lo sigui bela pa su famia tan stima. Cu

don Mario sosega na paz, den braza di nos Señor Jesus! (Red.M.Abdul)